

gemachet werden. Item das man an schuen nicht lenger snebel trage, denne eins finger gledes lang, also das maß gegeben ist vngeuerlich. Item das kein mansbilde snure, do golt inn getragen ist, vmbe die hute noch sust sich damit zcu snuren haben solle. Item das nymands, der eß von wirdikeit der grade nicht hat, mentele schuben noch rocke mit fehen adder hermeln vorbremen solle.

Item das sleth farn iunger lute gibbet vehl ergerniß, eß geschit vordechtig vehl vnczucht dorinne, eß ist keine erliche notdorft noch entschuldigung zeuthune, deßhalben vorgecziten von anreisinge geistlichir lute die sletten also sundig ding gar vorbrant wurden, die sachen wir itezunt also wol also sie die czit irkennen mogen; gebut der rat, das nymands in der statt zcu keiner czit vff sleten faren solle, er wolle danne obbir lant faren vngeuerlich.

Item das kein dinstbote manß adder wipßbilde siden gewant zcu keiner czirunge, ane meyde zcu czoppen, noch perlyn bende adder corellen tragen solle.

Item vor solliche stücke sal der vater adder der man vor syne kinder vnde syn wip antwortten vnde sal or darczu mechtig sin bei der busße hirnach berurt vnde ein yder hußherr vor sin gesinde.

Item wer hirweddir thun wirdet sal von iezlichir obirtretunge, wie dicke eß geschit, XX gr. zcu busße geben, die der rat vnleßlich nemen sal ydermanne vnuorschonet.

Item eß werdet mit fruon ortten die fyer gebrochen, die lute in lichtfertikeit geczogen vnde notliche innkeit wirdet vorstort; vormeinen sie zcu setzen, das man deß sontags vnde an höchsten festen ehr danne die messyn vß sin keine czeche halde an keinem ende, do man bir vnde wyn feile hat, vngeuerlich bei V gr., die der wert, der eß vorhenget, geben sal.

Vmbe wyschencken ist ein große rede vnder allem foleke, das man die wyne vorsollet vnde ergert mit geringern trancke vnde vnderstunden mit wasser, das man sie auch temperire, daruß vehl cranckheit kommet vnde von dem sollen werden sie erger. Man erleibet doch yderm sine wine zcugebin wie er wil, were ye billich vnde eß heischt vornunft vnde recht, das man yderm auch vor sin gelt gebe noch wirderunge, also eß sin sal; vormeint der rat zcu setzen, das man keinen win vngesaczt schencke vnde das man die selbige wine, wie die vffgetan werden, vnuorsollet vnde vnuormischt nicht anders danne also sie vffgetan werden schencken solle vnde vmbe mehr sicherheit an iezlichem vas, wanne eß vffgetan wirdet, das spont vorsygell. Item das der schencke swere das also zcuhalten. Vnde wer deß obbirfundeg wurde adder wenne er beschuldiget wurde, sich deß nicht entledigen wolde, sal deß X ß dem rate vorfallen sin adder der stat so lange entperen; wurde eß abber der herre vorschencken, so mag on der [rat] noch irkentniß straffen.

[Item das sollichs alles desde flisßiger gehalten werde, sal der burgermeister durch einen knecht alleine heimlich bestellen eczliche, die die obbertreter vorkundigen demselbigen knechte, der sie fort sal lassen vorzeichen; wer deß danne besaget wirdet, sal sich rechtfertigen ane alle wedderrede adder die busße geben, die man von ydem vnleßlich vnde vnuorschont nemen sall.

Item eß were auch not zcu ratslagen, ab man mit gliche vnde rechte durch grossern fliß die gerechtikeit der nedderlage baß irkennen muchte, das man neme